



REPUBLIKA E SHQIPËRISË
AUTORITETI I KONKURENCËS
KOMISIONI I KONKURENCËS

VENDIM
Nr. 547, Datë 24.09.2018

“Për dhënien e rekomandimeve për rritjen e konkurrencës gjatë procesit për dixhitalizimin e transmetimeve audiovizive”.

Komisioni i Konkurrencës me pjesëmarrjen e:

Znj. Juliana LATIFI	Kryetar
Z. Eduard YPI	Zv/Kryetar
Znj. Leida MATJA	Anëtar
Znj. Adriana BERBERI	Anëtar
Z. Helidon BUSHATI	Anëtar

Në mbledhjen e tij të datës 24.09.2018, shqyrtoi çështjen me:

Objekt: Mbi monitorimin e tregut të tregtimit të dekoderave DVB-T2.

Bazë ligjore: Neni 24, shkronja d dhe f, neni 70 i ligjit nr. 9121, datë 28.07.2003 “Për Mbrojtjen e Konkurrencës”, i ndryshuar.

Komisioni i Konkurrencës pas shqyrtimit të:

- Relacionit të Sekretarit të Përgjithshëm të Autoritetit të Konkurrencës “Mbi monitorimin e tregut të tregtimit të dekoderave DVB-T2”,

VËREN SE:

Nisur nga situata e krijuar në tregun e tregtimit të dekoderave, (aparateve marrës dixhital) DVB-T2, si detyrim i zbatimit të Strategjisë së kalimit të plotë nga transmetimet analoge në transmetimet numerike (dixhitale), e cila ka njoftuar fikjen e sinjalit të transmetimeve analoge audiovizive nga televizionet kombëtare apo ato lokale e rajonale, më datë 10 shtator 2018, për qarqet Tiranë dhe Durrës, Autoriteti i Konkurrencës ka realizuar një monitorim në ndërmarrjet që operojnë në këtë treg si dhe pikat e shitjes së autorizuara prej tyre.

Nga monitorimi i tregut u konstatua se në datat 10-11 shtator 2018, në disa pika tregtimi të kompanive “Digitalb” SHA dhe “Tring” SHA janë krijuar rradhë të gjata të qytetarëve të cilët kërkonin të pajiseshin me dekoder DVB-T2, edhe pse tregu i ofrimit të dekoderave është i gjerë, pra kjo paisje mund të blihet edhe në pika të tjera të tregtimit të pajisjeve elektroshtëpiake, përveç atyre të platformave dixhitale (Digitalb dhe Tring);

Kjo situatë, sipas vetë njoftimit të AMA-së shpërndarë më datë 13.09.2018, ka ardhur si pasojë e mungesës së informimit të publikut për mundësitë që ofronte tregu i paisjeve elektronike për përmbushjen e kërkesave të tyre.

Publiku ishte i painformuar lidhur me karakteristikat e dekoderave të përcaktuara me Vendimin e Këshillit të Ministrave nr.480, datë 03.06.2015, mundësinë e të gjitha këtyre dekoderave për të ofruar shërbimin e transmetimit numerik si dhe tregun e ofrimit të tyre.

Për sa më sipër, fushata informuese e realizuar nga AMA nuk ia ka arritur qëllimit të paralajmërojë dhe sqarojë publikun për mënyrën e tregimit të dekoderave dhe funksionimit të dixhitalizimit të transmetimit të kanaleve;

PËR KËTO ARSYE:

Komisioni i Konkurrencës, bazuar në nenin 24 shkronja d dhe f, neni 70, të ligjit nr. 9121, datë 28.07.2003 “Për Mbrojtjen e Konkurrencës”, i ndryshuar,

VENDOSI:

- I. T’i rekomandojë Autoritetit të Mediave Audiovizive (AMA);
 1. Rritjen e sensibilizimit ndaj opinionit publik, nëpërmjet fushatave informuese duke informuar publikun se tregu i shitjes së dekoderave DVB-T2 është treg i hapur dhe këto dekodera mund të sigurohen në cdo pikë shitje të paisjeve elektronike;
 2. Të gjithë dekoderat DVB-T2, të loguara ose jo nga platformat dixhitale ose operatorë të tjerë, të transmetojnë pa pagesë të gjitha programet ekzistuese analoge (kombëtare ose rajonale) duke ruajtur strukturën ekzistuese të tregut mediatik.
- II. Monitorimin e tregut të importit dhe shitjes me shumicë dhe pakicë të dekoderave nga ana e Autoritetit të Konkurrencës deri në kalimin përfundimtar nga transmetimi analog në transmetimin numerik (dixhital).
- III. AMA të informojë Autoritetin e Konkurrencës mbi zbatimin e këtij rekomandimi sipas pikës I të këtij vendimi brenda 45 ditësh nga marrja në dijeni.
- IV. Ngarkohet Sekretari i Përgjithshëm për zbatimin e këtij vendimi.

Ky vendim hyn në fuqi menjëherë.

KOMISIONI I KONKURRENCËS